

Proseminar HS15
MA Cornelia Ritter-Schmalz
Ovid, Heroides
Vorbereitung 1. Sitzung (15.09.15)

Text 1: Ov. *epist.* 7,1-25a (ed. Dörrie, 1971 (De Gruyter))

VII. DIDO AENEAE

Accipe, Dardanide, moriturae carmen Elissae;
quae legis a nobis ultima verba legi.

Sic ubi fata vocant, udis abiectus in herbis
ad vada Maeandri concinit albus olor.

Nec quia te nostra sperem prece posse moveri, 5
alloquor: Adverso movimus ista deo!

Sed meriti famam corpusque animumque pudicum
cum male perdiderim, perdere verba leve est.

Certus es ire tamen miseramque relinquere Didon
atque idem venti vela fidemque ferent. 10

Certus es, Aenea, cum foedere solvere naves
quaeque ubi sint nescis, Itala regna sequi.

Nec nova Karthago, nec te crescentia tangunt
moenia nec sceptro tradita summa tuo.

Facta fugis, facienda petis. Quaerenda per orbem 15
altera, quaesita est altera terra tibi.

Ut terram invenias, quis eam tibi tradet habendam?
quis sua non notis arva tenenda dabit?

Alter amor tibi †exstat †habendus et altera Dido
quamque iterum fallas, altera danda fides. 20

Quando erit ut condas instar Karthaginis urbem
et videas populos altus ab arce tuos?

Omnia ut eveniant nec di tua vota morentur,
unde tibi, quae te sic amet, uxor erit?

Uror ut inducto ceratae sulphure taedae, 25
ut pia fumosis addita tura rogis.